

**Uunga siunnersuut: Nioqutissanik eqqusuinermi akitsuutit pillugit Inatsisartut
inatsisaata allangortinneqarneranik Inatsisartut inatsisaat
(Puulukit nersutaatillu neqaasa akitsuutaannik atorunnaarsitsineq aamma
Nioqutissanik eqqusuineq annissuinerlu pillugit Inatsisartut inatsisaata
allannguutaasa malitsigisaannik allannguinerit)
*Aningaasaqarnermut Akileraartarnermullu Naalakkersuisumit saqqummiunneqartoq***

pillugu

**Aningaasaqarnermut Akileraartarnermullu Ataatsimiititaliap
inatsisissatut siunnersuutip pingajussaaneerpeqarneranut**

ISUMALIUTISSIISUTAA

Aningaasaqarnermut Akileraartarnermullu Ataatsimiititaliap suliarinninnermini kingullermik ilaasortarai:

Inatsisartunut ilaasortaq Asii Chemnitz Narup, Inuit Ataqtigiit, siulittaasoq
Inatsisartunut ilaasortaq Jens Frederik Nielsen, Demokraatit, siulittaasup tullia
Inatsisartunut ilaasortaq Peter Olsen, Inuit Ataqtigiit
Inatsisartunut ilaasortaq Pipaluk Lyngø, Mariia Simonsenimut sinniisussaq, Inuit Ataqtigiit
Inatsisartunut ilaasortaq Kuno Fencker, Siumut
Inatsisartunut ilaasortaq Karl Tobiassen, Siumut
Inatsisartunut ilaasortaq Knud Mathiassen, Attaviitsoq

UKA 2023-mi ulloq 28. september siullermeerinninnerup aammalu ulloq 10. november aappassaaneerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Nioqutissanik eqqusuinermi akitsuutit pillugit Inatsisartut inatsisaata allangortinneqarneranut siunnersuut tunngavoq, taamaaliornikkut puulukinik nersutaatinillu eqqusuinermi akitsuutip atorunnaarsikkallarneqarsimasup inatsimmut atuuttumut ilanngunneqarnissaa siunnersuutigineqarluni, atorunnaarsitsinerup ataavartunngortinneqarneranik kinguneqartumik.

Tamatuma saniatigut inatsisip allannguutaasa kingunerisaannik inatsimmi § 8-mi allannguutit ataasiakkaat aammalu tamatuma ilutigisaanik siunnersuummi (UKA2023/19) saqqummiunneqartumi allannguutissatut siunnersuutit malitsigisaannik inatsimmi § 9-p,

nioqqutissat arsaarinnissutigineqartarnerannut tigummineqarallartarnerannullu il.il. tunngasup, atorunnaarsinneqarnissaa siunnersuutigineqarput.

2. Siunnersuutip Inatsisartunit siullermeerneqarlunilu aappassaaneerneqarnera

Siunnersuut siullermeerneqarami aappassaaneerneqaramilu nalinginnaasumik taparserneqarpoq. Naalakkersuisut pingajussaaneerinninnissamut allannguutissatut siunnersuummik saqqummiussipput. Tamanna tunngavigalugu immikkoortoq Aningasaqarnermut Akileraartarnermullu Ataatsimiititaliamit suliarineqartussanngorlugu innersuunneqarpoq.

3. Tusarniaanermut akissutit

Tusarniaanermut akissutit inatsisissatut siunnersuummut ilanngunneqarsimapput, tamannalu Inatsisartut Siulittaasoqarfiata ilusiliinissamut piunmasaqaataanut naapertuuppoq. Siunnersuut piffissami 2023-mi 6. junimit 4. julimut tusarniaassutigineqartoq Naalakkersuisut paasissutissiissutigaa. Tusarniaanermut akissutit tiguneqartut tunngavigalugit Naalakkersuisut tusarniaanermut allakkiamik suliaqarput, taannalu inatsisissatut siunnersuummut ilanngussatut ilanngunneqarsimavoq.

4. Siunersuineq

Ataatsimiititaliap siunnersuutinik UKA2023/23, UKA2023/24 aamma UKA2023/112 suliarinninnerani atugassatut ataatsimiititaliaq apeqquteqarlunilu ataatsimiititaliap apeqqutaasa akineqarnissaannut Aningasaqarnermut Akileraartarnermullu Naalakkersuisumik siunersuininissamut aggersaavoq. Aningaasanut inatsisissap isumaqatigiinniutigineqarnera tunngavigalugu siunnersuutip matuma pingajussaaneerneqarnissaanut allannguutissatut siunnersuummik saqqummiussisoqassasoq Aningasaqarnermut Akileraartarnermullu Naalakkersuisup siunersuineri paasissutissiissutigaa. Siunersuininissamut aggeqqusissut aammalu siunersuineri allakkiaq isumaliutissiissummut matumunnga ilanngussatut ilanngunneqarput.

5. Naalakkersuisut pingajussaaneerinninnissamut allannguutissatut siunnersuutaat

Siunnersuutip pingajussaaneerneqarnissaanut Naalakkersuisut allannguutissatut siunnersuummik saqqummiussipput. Alannguutissatut siunnersuut aqqutigalugu marlunnik allannguinnissaq Naalakkersuisunit siunnersuutigineqarpoq. Immikkoortup siulliup kinguneraa imeruusaatinut puup ataatsip akitsuutaata 60 øremik apparneqarnera, taamaalilluni imeruusaatinut puup ataatsip ilanngaaseereerluni 0,25 literi tikillugu akitsuutaa 1 kr. 40 øreulluni aammalu puup ataatsip ilanngaaseereerluni 0,25 literi sinnerlugu akitsuutaa 2 kr. 90 øreulluni. Immikkoortup aappaa imeruusaatit puuinut akitsuummik Qaanaamut, Ittoqqortoormiitut Tasiilamulluunniit eqqussorneqartunut akiliisussaannnginnermut tunngassuteqarpoq.

6. Ataatsimiititaliap siunnersuummik suliarinninnera

Naalakkersuisut allannguutissatut siunnersuutaata sukumiisumik suliarineqarnissaa siunertaralugu siuliani oqaatigineqartut siunnersuut ataatsimiititaliamit suliarineqartussanngorlugu innersuunneqarpoq. Qulequttat siunnersuummi aallaqqaammut pineqartut allannguutissatut siunnersuummi pineqanngillat. Allannguutissatut siunnersuummut ataatsimiititaliaq ima oqaaseqaateqarumavoq.

2024-mut aningaasanut inatsisissamut isumaqatigiissuteqarneq tunngavigalugu allannguutissatut siunnersuutit saqqummiunneqartut, taamaattumillu allannguutissatut siunnersuutit aningaasanut partiinit inatsisissamut isumaqatigiissummik atsiuisimasunit nalinginnaasumik taparserneqartut ataatsimiititaliamit oqaatigineqassaaq.

7. Siunnersuutip aningaasaqarnikkut kingunerisassai

Siunnersuutip piviusunngortinneqarnerani aningaasatigut kingunerisassat siunnersuummut nalinginnaasumik nassuiaatini allaaserineqarput. Pisortanut aningaasatigut allaffissornikkullu kingunerisassat, siunnersuummut nalinginnaasumik nassuiaatini allassimasut, ersernerluttut ataatsimiititaliaq isumaqarpoq. Tassunga atatillugu immikkoortup siulia ataatsimiititaliamit innersuussutigineqarpoq.

8. Ataatsimiititaliap inassuteqaatai

Allannguutissatut siunnersuut akuerineqassasoq ataatsimiititaliami amerlanerussuteqartut Inuit Ataqtiginiinersut Siumumeersullu inassutigaat.

Ataatsimiititaliami ikinnerussuteqartoq Demokraatineersoq ikinnerussuteqarluni ima oqaaseqaateqarumavoq:

“Inatsisissatut siunnersuutip ilaa neqinut akitsuutit peerneqarnissaannut tunngasoq Demokraatinit isumaqatigilluinnaratsigu siulliullugu erseqqissaatigissavara. Nunatsinni asasatsinni inuuniarneq najugaqarnerlu akikinnerusariaqartut isumaqaratta tamanna nammineq siunnersuutiginiukuurput. Nunatsinni innuttaasut nalinginnaalluinnartut aningaasaqarnerannut pitsaasumik tamanna kinguneqassaaq, taakkumi ulluinnarni nioqutissanik pisiniarnerminni aningaasaatimik ilaat amerlanerusut piginnarsinnaalissavaat.

Inatsisissatut siunnersuutip immikkoortuata aappaa qiviarutsigu tamanna allarluinnaavoq. Matumani aallarniutigalugu oqaatigiumavarput puunut imeruusaatinik imalinnut akitsuutit siunnersuummut matumunnga, Inatsisartunit isumaqatigiiffiulluurtumut, Naalakkersuisunit ilanngunneqariataarnerat assorsuaq kusanaamat. Tamat oqartussaaqataanerannik ataqqinnikkaanni nalinginnaasumik pisarnertut Naalakkersuisut siunnersuut Inatsisartunit pingasoriarlugu suliarineqartissimagaluarpassuk pitsaasimassagaluarpoq. Puunut akitsuutip appartinneqarnera pineqaraluartoq pineqartoq tassaavoq akitsuut atuisartunit siusinnerusukkut akilerneqartanngikkaluartoq. Matumani ilassutigineqartoq aqqutigalugu innuttaasut kaasarfiinit 85 mio. kr.-it missaat aaneqarput, tamannalu

tapersersinnaangilluinnarparput. Tamatuma saniatigut nunap immikkoortuisa ilaasa akitsuuteqartinneqannginnerat Naalakkersuisut ingerlatiinnarniarpaat, taamaalillutillu sumi najugaqarnissamik aalajangiineq inunngorsimanerluunniit apeqqutaatillugu assigiinngisitsinermik eqqussillutik. Puunut akitsuut atorunnaarsinneqarsimasussaagalarpoq innuttaasullu kaasarfiinit aallerfissatut isigineqarani.

Siuliani allassimasut tunngavigalugit inatsisissatut siunnersuummut matumunnga taaseqataangitsoortariaqarpugut, neqinut akitsuutit atorunnaarsinnissaat assut isumaqatigigaluarlutigu.”

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Asii Chemnitz Narup
Siulittaasoq

Jens Frederik Nielsen
Siulittaasup tullia

Karl Tobiassen

Pipaluk Lyngø

Kuno Fencker

Peter Olsen

Knud Mathiassen